

Reykjavík, 8. nóvember 2018

Um leið og Þjóðleikhúsið þakkar frábæra samvinnu og viðtökur vegna farar okkar með leiksýninguna *Brúðukistan-Sögustund* á yfirstandandi leikári þá óska ég eftir áframhaldandi samvinnu næsta leikár. Þetta leikár sýndum við rúmlega 30 sýningar á yfir 20 stöðum fyrir um 4000 börn á landsbyggðinni og er það mögulegt vegna samvinnu við sveitarfélög og skóla um land allt.

Næsta haust stefnir Þjóðleikhúsið á för um allt land með leiksýningu fyrir 3-5 ára börn sem nefnist *Ég get* eftir Peter Engkvist. Verkið var frumsýnt í Kúlunni í Þjóðleikhúsini í byrjun árs og hlaut mikið lof gagnrýnenda og áhorfenda. Leikstjóri er Björn Ingi Hilmarsson. *Ég get* er ljóðræn leiksýning fyrir yngstu börnin, um það sem er mitt og þitt og okkar. Í verkinu kynnumst við tveimur litlum manneskjum sem eru að æfa sig í að vinna saman. Þær leika sér saman, prófa sig áfram og komast að því hvað gerist þegar forsendum í leiknum er breytt. Þjóðleikhúsið mun bjóða inn á sýninguna enda er mikilvægt að börn geti notið lista án aðgreiningar vegna fjárhags og búsetu. *Ég get* er skemmtileg leikhúsupplifun fyrir börn sem eru að læra á heiminn, fallegt leikhúsfræ sem vonandi fær leikhúsáhugann til að blómstra.


Áætlun okkar er að hefja ferðalagið á Vestfjörðum í byrjun september, fara þaðan á Norðurland, svo Austurland, Suðurland, Vesturland, Reykjanes og ljúka því um miðjan október í Vestmannaeyjum.

Það sem við óskum eftir frá ykkur er eftirfarandi:

- Að útvega sýningarrými, það rými þarf að vera hægt að myrkva, gott ef til staðar er 32svar ampera tengill, annars a.m.k. 4 rafmagnstenglar fyrir 220 volta rafmagn. Lofthæð þarf að vera 3 metrar. Leikrými (leikmynd + svið) þarf að vera minnst 6x4 metrar og svo þarf að vera pláss fyrir áhorfendur.
- Gistingu (á þeim stöðum sem þarf) í uppábúnum rúnum fyrir 3 einstaklinga þann tíma sem uppsetning og sýningar koma til með að taka.

Mín von er að með þessari sýningu sé Þjóðleikhúsið meira þjóðleikhús í því að sinna landsbyggðinni betur og við munum að sjálfsögðu gera okkar til þess að gagnrýnendur og fjölmíðlar mæti og segi frá viðburðinum.

Við munum á næstu dögum fylgja þessu bréfi eftir með nánari upplýsingum. Allar fyrirspurnir má senda á elin@leikhusid.is



Ari Matthiasson, Þjóðleikhússtjóri